



Minggu, 10 November 2024

Ogen: Masmur 73:4



"Megegeh Ras Sehat"



Masmur 73:4 enda banci jadi erbahan ceda ukurta, sebab arah pengidaha dingen iakui bas ayat enda maka melala kalak jahat sehat mejuah-juah geluhna la ka sakit-sakit.

Sementara banci jadi kita genduari paksana erbebe ibas situasi si sakit-sakiten, la sangap ras mbue perbebenta. Engkai maka kalak jahat sangap? Banci jadi e mentas bas perukurenta. Situasi

sibage kepeken nggo rusur terjadi bas kegeluhen bas kerina zaman. Emaka ola ateta mamang. Ogenta enda mabai kita guna merenungkan piga-piga hal, gelahna paguh kinitekenta, eme:

1. Perbedan cara rukur jelma ras cara rukur Tuhan. Masmur 73 enda nuduhkan pengidah manusia si terbatas. Kebiasanta terjeng ngidah kai siarah darat, alu la ngeteh rencana ras tujun Dibata siterbelinen. Bas kita sangap e adi sehat la lit perbeben. Tapi bas Dibata sangap e lit ertina siterbelinen.

2. Kemalemen ate si tuhu-tuhu. Ibas Dibata kemalemen ate si tuhu-tuhu labo erta doni siermasap-masap. Tapi hal si kekal ras hal pertendin. Kemalemen ate situhu-tuhu lit bas hubungenta si mehuli ngenca ras Tuhan labo arah erta benda.

3. Ujin ras Perturah Kiniteken. Uga maka kalak jahat sangap, enda banci jadi gelah ia bertobat. Uga maka kalak bujur melala perbebenna, jababna sada ngenca arah kerina masalah enda ate Dibata menguji kita ras mpebagesi kinitekenta.

4. Tuhan e adil ras bujur. Dibata e hakim si adil ras bujur. Amin gia kalak jahat gundari tempa sehat, mejuah-juah la lit kadena pe kurang, tapi man kalak jahat si la bertobat bas paksana pagi keadilan Dibata itegakken bas paksana. Emaka ula mengga ateta bas geluh kalak jahat e, amin kita bas paksa kesusahen padahal enggo si mehuli si dalanken tetaplah megegeh tendi ras sehat kulanta.